



ISTITUT CULTURAL LADIN
MUSEO LADIN DE FASCIA

COMUNICAT STAMPA

Sèn Jan, ai 9 de setember 2021

MIE MUSEO

arpejon per l davegnir / per ereditare il futuro

Museo Ladin de Fascia

14.09.2021 – 11.10.2021

01.12.2021 – 15.04.2022

«**Mie Museo. Arpejon per l davegnir / Per ereditare il futuro**» l é l titol de la mostra che nasc col zil de ge jir do a la storia de Museo, scomenzèda del 1981 te dotrei cambres de l Istitut Cultural Ladin e jita inant, pean via dal 2001, te la neva senta de anchecondi.

Enlongia l percors la **storia de Museo** vegn **contèda tras la persones che à dat sie contribut**; l'é metù al luster ence i toc de maor enteres tras chi che la é jent che à donà e emprestà la é doentèda protagonista. N lurier de comunanza donca, segnà da moments, èrc, testimonianzes e persones che – descheche recorda la conservadora de Museo, Daniela Brovadan, – “à volù ge lascèr a la neva generaziions informaziions e valores che ne deida a entener l temp de anchecondi e che ne dèsc l met de enstradèr l davegnir”.

Portèda dant te n percors temporèl e tematic, la mostra vel **ge sporjer n develpai a duta la jent che te chisc egn à dat sie contribut per meter su l Museo Ladin**, no demò metan a la leta sie temp ma soraldut tras gran gaissa e amor, per tegnir su e sparpagnèr fora la cultura ladina. E l dialogh co la jent seghita enscin a la fin del percors, olache se pel veder l video “**Musc e oujes de Museo**” - n grop de jent che disc fora sie esser e se sentir ladins anchecondi – e, amò apede, na lèrga, **desche n cantier**, olache vegn domanà de scriver n pensier e neva ispiraziions sul davegnir del Museo.

Na veièda sun dut de chel che l é stat, che l é e che sarà l Museo Ladin de Fascia, fata de condivijion e confront, aldò del slogan del cedeon “mia majon, mia storia, mia parlèda”, acioche l Istitut Culturale Ladin, ence tras l Museo, l seghite a portèr dant con respet e gaissa l prezios lurier de stravardament ma, tel medemo temp, l se aure amò de più a la jent, percheche vigniun de nos posse sentir sia, e apontin MIA, la realtà che chesta istituzion raprejentea.